



## **Služba za reviziju finansijskog poslovanja**

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 18. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

### **IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2007. GODINU STRANKE PENZIONERA-UMIROVLJENIKA BOSNE I HERCEGOVINE**

Broj: 03-07-6-3409/08  
Sarajevo, 27. marta 2009. godine

## SADRŽAJ:

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS REVIZIJE .....	5
Predmet revizije .....	5
Cilj revizije .....	5
Obim revizije .....	5
4. PRETHODNE REVIZIJE .....	5
5. NALAZI I PREPORUKE .....	6
5.1. NALAZI .....	6
5.2. PREPORUKE .....	7

## MIŠLJENJE REVIZORA

Služba za reviziju finansijskog poslovanja u Centralnoj izbornoj komisiji Bosne i Hercegovine izvršila je reviziju godišnjeg finansijskog izvještaja Stranke penzionera-umirovljenika Bosne i Hercegovine za 2007. godinu.

Rukovodstvo stranke je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

**Utvdili smo da Stranka penzionera-umirovljenika Bosne i Hercegovine u izvještajnom periodu nije postupila u skladu sa odredbama člana 8. stav (1) i člana 11. stav (1) i (3) Zakona o finansiranju političkih stranaka.**

**Prema našem mišljenju, osim navedenog, revidirani finansijski izvještaj ukazuje da je Stranka penzionera-umirovljenika Bosne i Hercegovine u 2007. godini postupala u skladu sa odredbama Zakona o finansiranju političkih stranaka.**

## 1. UVOD

Služba za reviziju finansijskog poslovanja u Centralnoj izbornoj komisiji BiH je izvršila reviziju godišnjeg finansijskog izvještaja Stranke penzionera-umirovljenika Bosne i Hercegovine za 2007. godinu.

Revizija je preduzeta u skladu sa članom 14. stav (1) Zakona o finansiranju političkih stranaka («Službeni glasnik BiH» broj 22/00), članom 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 2. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08).

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Stranka penzionera-umirovljenika Bosne i Hercegovine je iskazala ukupne prihode u iznosu od 245.018,00 KM, čija struktura je data u sljedećoj tabeli:

<b>Red. br.</b>	<b>Vrsta prihoda</b>	<b>Iznos u KM</b>	<b>Učešće u uk.prih. %</b>
1	Članarina	42.471,00	17,33%
2	Prilozi fizičkih lica	2.100,00	0,86%
3	Prilozi pravnih lica	550,00	0,22%
4	Prihodi od imovine	421,00	0,17%
5	Prihodi od pr.lica	0,00	0,00%
6	Prihodi od poklona	1.870,00	0,76%
7	Prihodi iz budžeta	197.606,00	80,65%
	Ostali prihodi		0,00%
	<b>Ukupni prihodi:</b>	<b>245.018,00</b>	<b>100,00%</b>

U godišnjem finansijskom izvještaju stranka je iskazala ukupne rashode u iznosu od 207.895,00 KM.

## 2. PREDSTAVLJANJE POLITIČKE STRANKE

Naziv političke stranke: Stranka penzionera-umirovljenika Bosne i Hercegovine. Skraćeni naziv stranke je SP-U BiH.

Stranka je upisana u registar političkih organizacija pod brojem R-I-4/02. Posljednja registracija je izvršena 19.03.2007. godine u Općinskom sudu u Sarajevu pod brojem 065-0-Reg-07-000122. Sjedište političke stranke je u Sarajevu, ulica Azize Šaćirbegović br. 2.

Prema podacima iz godišnjeg finansijskog izvještaja za 2007. godini ovlaštena lica za zastupanje stranke su: Isak Salko, predsjednik, Mehmed Nurkanović, zamjenik predsjednika, Vinko Pandža, predsjednik Glavnog odbora i Avdija Uzunović, zamjenik predsjednika Glavnog odbora. Rješenjem Općinskog suda u Sarajevu, broj: 065-0-Reg-08-00184-I od 30.06.2008. godine, kao ovlaštena lica za zastupanje i predstavljanje stranke u registar promjene lica ovlaštenih za zastupanje Stranke penzionera – umirovljenika Bosne i Hercegovine su upisani: Nurkanović Mehmed, predsjednik, Isak Salko, zamjenik predsjednika i Uzunović Avdija, podpredsjednik.

Lice ovlašteno za podnošenje finansijskih izvještaja za 2007. godinu je Azijada Lagumdžija.

Prema podacima iz godišnjeg finansijskog izvještaja za 2007. godinu, organizacionu strukturu Stranke penzionera-umirovljenika Bosne i Hercegovine čine:

- Glavni odbor SP-U BiH Sarajevo,
- 9 kantonalnih odbora,
- 1 gradski odbor i 65 opštinskih odbora.

### **3. OPIS REVIZIJE**

**Predmet revizije** je godišnji finansijski izvještaj Stranke penzionera-umirovljenika Bosne i Hercegovine za 2007. godinu i to sljedećih organizacionih dijelova:

- Glavni odbor SP-U BiH Sarajevo,
- Opštinski odbor SP-U BiH Grude, i
- Opštinski odbor SP-U BiH Bihać.

**Cilj revizije** je da revizoru omogući da izrazi mišljenje o tome da li je Stranka penzionera-umirovljenika Bosne i Hercegovine u izvještajnom periodu postupala u skladu sa odredbama Zakona o finansiranju političkih stranaka.

**Obim revizije** finansijskih izvještaja SP-U BiH obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta i priloge fizičkih lica.

### **4. PRETHODNE REVIZIJE**

Izvršen je pregled godišnjeg finansijskog izvještaja Stranke penzionera-umirovljenika Bosne i Hercegovine za 2005. godinu i izdat izvještaj o pregledu sa mišljenjem revizora, nalazima i preporukama revizije. Služba za reviziju je, takođe, izvršila pregled godišnjeg finansijskog izvještaja za 2006. godinu i izdala izvještaj o pregledu sa mišljenjem revizora, nalazima i preporukama da stranka treba da postupa u skladu sa odredbama člana 8. stav (1) Zakona o finansiranju političkih stranaka. Izvještaj o pregledu godišnjeg finansijskog izvještaja za 2006. godinu je stranci dostavljen nakon što je politička stranka Centralnoj izbornoj komisiji BiH podnijela godišnji finansijski izvještaj za 2007. godinu.

#### **Nerealizovane preporuke**

Na osnovu uočenih nedostataka u godišnjem finansijskom izvještaju za 2007. godinu, utvrđeno je da politička stranka nije ispoštovala preporuke koje su date u navedenim izvještajima. Stranka penzionera-umirovljenika Bosne i Hercegovine je i u 2007. godini koristila prostorije Fonda PIO/MIO, što je suprotno odredbama člana 8. stav (1) Zakona o finansiranju političkih stranaka.

## 5. NALAZI I PREPORUKE

### 5.1. NALAZI

#### a) Stranka penzionera-umirovljenika Bosne i Hercegovine nije postupila u skladu sa odredbama člana 8. stav (1) Zakona o finansiranju političkih stranaka.<sup>1</sup>

Kantonalni odbori Stranke penzionera-umirovljenika BiH Zenica<sup>2</sup> i Sarajevo<sup>3</sup> koriste, na osnovu ugovora i bez plaćanja naknade, poslovne prostorije površine 24,60 m<sup>2</sup> odnosno 45 m<sup>2</sup>, koje su u vlasništvu Fonda PIO/MIO. Osim što je bez plaćanja zakupnine koristio poslovne prostorije Fonda PIO/MIO u Sarajevu, Kantonalni odbor Stranke penzionera-umirovljenika BiH nije plaćao ni troškove električne energije, vode i grijanja, čime je, takođe, primio prilog koji ja zabranjen članom 8. stav (1) Zakona o finansiranju političkih stranaka.

Na osnovu dopisa Stranke penzionera-umirovljenika BiH, utvrđeno je da stranka odnosno njeni odbori koriste bez naknade prostorije opštinskih organa uprave. Trinaest (13) opštinskih odbora koristi poslovne prostorije opština i to: Novi grad, Stari grad, Centar, Novo Sarajevo, Zavidovići, Visoko, Breza, Kakanj, Tešanj, Bosanska Krupa, Jablanica, Glamoč i Tuzla, i Kantonalni odbor Tuzla.

Korištenjem poslovnih prostorija u vlasništvu opština i Fonda PIO/MIO bez plaćanja, stranka je postupila suprotno odredbama člana 8. stav (1) Zakona o finansiranju političkih stranaka.

Osim navedenog, Stranka penzionera-umirovljenika BiH je primila prilog pravnog lica „Komunalno“ JP d.o.o. Žepče, što je suprotno odredbama člana 8. stav (1) Zakona o finansiranju političkih stranaka. Naime, utvrđeno je da je OO SP-U BiH Žepče dana 19.12.2007. godine primio sredstva od ovog pravnog lica u iznosu od 200,00 KM. Takođe je utvrđeno da je politička stranka ova sredstva iskazala na obrascu 3-b (prilozi pravnih lica veći od 100,00 KM) godišnjeg finansijskog izvještaja za 2007. godinu.

#### b) Stranka je prekršila odredba člana 11. stav (1) i (3) Zakona o finansiranju političkih stranaka.

Politička stranka nije vodila evidenciju o svojim prihodima i rashodima<sup>4</sup> i godišnji finansijski izvještaj za 2007. godinu nije popunila u skladu sa Pravilnikom o godišnjim finansijskim izvještajima političkih stranaka („Službeni glasnik BiH“ broj 61/06).<sup>5</sup>

- Evidencije koje su vođene o prihodima i rashodima SP-U BiH u 2007. godini su nepotpune. Stranka penzionera-umirovljenika BiH nije vodila evidencije o prihodima i rashodima OO SP-U BiH Grude u poslovnim knjigama.
- Stranka penzionera-umirovljenika Bosne i Hercegovine nije na obrascu 2 iskazala podatke o početnom stanju, prometu ulaza i izlaza, i stanju na dan 31.12.2007. godine transakcijskog

<sup>1</sup> Državni, entitetski i kantonalni organi, organi opštinskih i mjesnih zajednica, javne institucije, javna preduzeća, humanitarne organizacije, preduzeća koja su po svojoj djelatnosti isključivo neprofitna, vjerske zajednice, kao i privredna udruženja u kojima uloženi javni kapital iznosi najmanje 25% ne mogu da finansiraju političke stranke.

<sup>2</sup> Ugovor o korištenju poslovne prostorije br. 1396/03 od 17.02.2003. godine.

<sup>3</sup> Ugovor o zakupu poslovnog prostora br. 06/1-1079/07 od 30.07.2007. godine.

<sup>4</sup> U skladu sa članom 11. stav (1) Zakona o finansiranju političkih stranaka političke stranke su obavezne voditi evidenciju o svojim prihodima i rashodima.

<sup>5</sup> U skladu sa članom 11. stav (3) Zakona, do 31.03. naredne godine političke stranke podnose finansijski izvještaj u formi koju odobri Centralna izborna komisija BiH. Forma finansijskih izvještaja je propisana Pravilnikom o godišnjim finansijskim izvještajima političkih stranaka („Službeni glasnik BiH“ broj 61/06).

računa OO SP-U BiH Grude broj 3381402200394950, koji je otvoren u UniCredit Zagrebačkoj banci. Revizijom je utvrđeno da je OO SP-U BiH Grude po početnom stanju, tj. stanju na dan 19.07.2007. godine na transakcijskom računu imala sredstva u iznosu od 37,14 KM. Ukupan promet ulaza u 2007. godini je iznosio 800,99 KM, a promet izlaza 5,50 KM. Stanje na dan 31.12.2007. godine je iznosilo 832,63 KM.

- Stranka penzionera-umirovljenika BiH nije popunila obrazac prihoda iz budžeta u skladu sa članom 19. Pravilnika o godišnjim finansijskim izvještajima političkih stranaka. Stranka na obrascu 3. f (prihodi iz budžeta) nije navela prihode iz Budžeta Općine Grude. Naime, OO SP-U BiH Grude je dana 19.07.2007. godine iz Budžeta Općine Grude primio sredstva u iznosu od 800,00 KM.
- Uvidom u ugovor o zakupu poslovnih prostorija i glavnu knjigu Glavnog odbora Stranke penzionera-umirovljenika Bosne i Hercegovine utvrđeno je da stranka u poslovnim knjigama nije iskazala troškove zakupa za poslovne prostorije u Travniku za period oktobar - decembar 2007. godine u ukupnom iznosu od 870,00 KM. Stranka je i u godišnjem finansijskom izvještaju za 2007. godinu troškove zakupa iskazala u manjem iznosu za 870,00 KM. Stranka nije iskazala ni obaveze prema dobavljaču po istom osnovu na obrascu 5 godišnjeg finansijskog izvještaja, čime je prekršila odredbe člana 23. Pravilnika o godišnjim finansijskim izvještajima političkih stranaka.
- Uvidom u poslovne knjige Glavnog odbora SP-U BiH utvrđeno je da stranka nije pravilno iskazala troškove po kontima na obrascima godišnjeg finansijskog izvještaja. Stranka je iskazala ukupne troškove u iznosu od 27.028,77 KM, što odgovara podacima iskazanim u poslovnim knjigama Glavnog odbora SP-U BiH. Međutim, raspored troškova na obrascu 4-1 (režijsko-administrativni i ostali troškovi) po vrstama troškova ne odgovara podacima na analitičkim kontima troškova. Na taj način, stranka je dva puta iskazala troškove zakupnine i to kao trošak zakupnine i u sumi materijalnih troškova, dok je ostale troškove iskazala umanjene za iznos zakupnine.

## 5.2. PREPORUKE

*Preporučuje se Stranci penzionera-umirovljenika Bosne i Hercegovine da se pridržava odredbi Zakona o finansiranju političkih stranaka, a posebno na osnovu uočenih nedostataka se preporučuje:*

- *da postupa u skladu sa odredbama člana 8. stav (1) i člana 11. stav (1) i (3) Zakona o finansiranju političkih stranaka i to:*
  - *da ne prima priloge koji su zabranjeni,*
  - *da vodi evidencije o svojim prihodima i rashodima, i*
  - *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.*
- *da uspostavi odgovarajuće evidencije o uplatama sredstava iz budžeta u cilju što tačnijeg iskazivanja podataka u finansijskim izvještajima;*

- *da ustroji upravljanje gotovinom putem blagajne i uvede obavezu vođenja blagajničkih izvještaja na dnevnom nivou uz obavezne priloge (nalog uplate i nalog isplate; dokumenta na osnovu kojih se vrše isplate putem blagajne). Poslovanje blagajne treba urediti tako da se razgraniče dužnosti odobravanja isplate, evidentiranja i isplate gotovine uz prethodno definisanje visine blagajničkog maksimuma<sup>6</sup>.*

## **KOMENTAR**

U ostavljenom roku, Stranka penzionera-umirovljenika Bosne i Hercegovine se nije očitovala na Preliminarni izvještaj o reviziji godišnjeg finansijskog izvještaja za 2007. godinu.

Zahvaljujemo se ovlaštenoj osobi za finansijske izvještaje Stranke penzionera-umirovljenika Bosne i Hercegovine na dobroj i korektnoj saradnji tokom obavljanja revizije finansijskih izvještaja.

Mr. Hasida Gušić, šef Službe

Sanja Čabrilo, revizor

Željko Bakalar, pomoćnik revizora

---

<sup>6</sup> Uvidom u dokumentaciju odbora čiji su izvještaji bili predmet revizije utvrđeno je da su blagajnički izvještaji sačinjavani mjesečno.